

四庫全書

集部

欽定四庫全書

集部

御選歷代詩餘卷

八十九
九十九

詳校官中書

臣潘有為

侍讀_臣孫球覆勘

總校官進士

臣

朱

鈐

校對官中書

臣

徐秉敬

謄錄監生

臣

張

鱗

欽定四庫全書

御選歷代詩餘卷八十九目錄

一百十四字

沁園春

上

蘇軾

賀鑄

趙師俠

張元幹

曾覲

辛棄疾 十二首

丘宓

劉克莊 四首

劉清夫

程秘 三首

王千秋

劉圻父

陸游 二首

劉過 九首

張輯

黃機 五首

劉鎮 二首

御選歷代詩餘卷八十九目錄

欽定四庫全書

選歷代詩餘卷八十九

一百十四字

司經局洗馬掌局事
銜翰林院修撰加二級
臣王奕清奉

日校刊

沁園春

上

又一體雙調
一百十四字

沁園春

蘓軾

孤館燈青野店雞號旅枕夢殘
漸月華收練晨霜耿耿

雲山摘錦朝露漙漙世路無窮勞生有限似此區區長
鮮歡微吟罷凭征鞍無語往事千端 當時共客長安
似二陸初來俱少年有筆頭千字胸中萬卷致君堯舜
此事何難用舍由時行藏在我袖手何妨閒處看身長
健但優游卒歲且鬪尊前

前調

賀 鑄

宮燭分煙禁池開鑰鳳城暮春向落花香裏澄波影外
笙歌遲日羅綺芳塵載酒追遊聯鑣歸晚燈火平康尋

夢雲逢迎處最多才自負巧笑相親
離羣客宦漳濱
但驚見來鴻歸燕頻念日邊消耗天涯悵望樓臺清曉
簾幙黃昏無限悲涼不勝憔悴斷盡危腸消盡魂方年
少恨浮名誤我樂事輸人

前調

避暑

趙師俠

羊角飄塵金烏鑠石雨過如秋有虛堂臨水披襟散髮
紗幙卷霧湘簾波浮遠列雲峰近參荷氣臥看文書琴
枕頭蟬聲寂向莊周夢裏栩栩無謀
茶甌醒困堪求

卷八十九
麕飽飯安居可以休算脩閒靜勝吾能自樂榮華紛擾
人漫多愁習嬾非癡覺迷是病一力那能勝九牛但休
問且追尋觴咏知友從遊

前調

張元幹

歌枕深軒散帙虛堂畏景屢移漸披襟臨水搯牀就月
蓮香拂面竹色侵衣壓玉為醪折荷當殘臥看河漢星
四垂人歸去聽饑蟬自嘯宿鳥相依癡兒莫道危機
悟三十九年都盡非任紆朱拖紫圖金佩玉青錢流地

白璧如坻富貴浮雲身名零露事事無心歸便歸秋風
動正吳淞月冷蓴長鱸肥

前調

曾覲

更漏迢迢乍寒天氣畫燭對牀正井梧飄砌邊鴻度月
故人何處水遠山長老去功名年來情緒寬盡寒衣銷
舊香除非是仗蠻牋象管時伴吟牕詞章莫話行藏
且喜見捷書來帝鄉看銳師雲合妖氛電掃隋堤官柳
依舊成行夢繞他年青門紫陌對酒花前歌正當空成

恨奈潘郎兩鬢新點吳霜

前調

帶湖新
居將成

辛棄疾

三徑初成鶴怨猿驚稼軒未來甚雲山自許平生意氣
衣冠人笑抵死塵埃意倦須還身閒貴早豈為尊羹鱸
膾哉秋江上看驚弦鴈避駭浪舡回東岡更葺茅齋
好都把軒牕臨水開要小舟行釣先應種柳疎籬護竹
莫礙觀梅秋菊堪餐春蘭可佩留待先生手自栽沉吟
久怕君恩未許此意徘徊

前調

送趙景明東
歸用前韻

辛棄疾

竚立瀟湘黃鵠高飛望君未來快東風吹斷西江對語
急呼斗酒旋拂塵埃却怪英姿有如君者猶欠封侯萬
里哉空贏得道江南佳句只有方回錦帆畫舫行齋
悵雲浪縠天江景開記我行南浦送君折柳君逢驛使
為我攀梅落帽山前呼鷹臺下人道花須滿縣栽都休
問看雲霄高處鵬翼徘徊

前調

答余
叔良

辛棄疾

我試評君君定何如玉川似之記李花初發乘雲笑語
梅花開後對月相思白髮重來畫橋一望秋水長天孤
鶯飛同吟處看珮搖明月衣捲青霓相君高節崔嵬
是此處耕巖與釣溪被西風吹盡村簫社鼓青山留得
松蓋雲旗弔古愁濃懷人日暮一片心從天外歸新詞
好似淒涼楚些字字堪題

前調

答楊世長
用前韻

辛棄疾

我醉狂吟君作新聲倚歌和之算芬芳定向梅間得意

輕清多是雪裏尋思朱雀橋邊何人曾道野草斜陽春
燕飛都休問甚元無霖雨却有晴霓詩壇千丈崔嵬
更有筆如山墨作溪看君才未數曹劉敵手風騷合受
屈宋降旗誰識相如平生自許慷慨須乘駟馬歸長安
路問垂虹千柱何處曾題

前調

用前韻

辛棄疾

有美人兮玉佩瓊琚我夢見之問斜陽猶照漁樵故里
長橋誰記今古相思物化蒼茫神遊彷彿春與猿吟秋

鶴飛還驚笑向晴波忽見千丈虹霓
覺來西望崔嵬
更上有青楓下有溪待空山自薦寒水秋菊中流却送
桂棹蘭旗萬事長嗟百年雙鬢吾非斯人誰與歸凭闌
久正清愁未了醉墨休題

前調

弄溪

辛棄疾

有酒忘杯有筆忘詩弄溪奈何看縱橫斗轉龍蛇起陸
崩騰決去雪練傾河媚媚東風悠悠倒影搖動雲山水
又波還知否欠菖蒲攢港綠竹緣坡
長松誰翦嵯峨

笑野老來耘山上木算只因魚鳥天然自樂非關風月
閒處偏多芳草春深佳人日暮濯髮滄浪獨浩歌徘徊
久問人間誰似老子婆娑

前調

辛棄疾

一曲西來千丈晴虹十里翠屏喜草堂經歲重來杜老
斜川好景不負淵明老鶴高飛一枝移宿長笑蝸牛戴
屋行平章了待十分佳處著個茅亭青山意氣崢嶸
似為我歸來嫵媚生解頻教花鳥前歌後舞更催雲水

暮送朝迎酒聖詩豪可能無勢我乃而今駕馭卿清溪
上被山靈却笑白髮歸耕

前調

將止酒戒
使勿近杯

辛棄疾

杯汝前來老子今朝點檢形骸甚長年抱渴咽如焦釜
於今喜溢氣似奔雷漫說劉伶古今達者醉後何妨死
便埋渾如許歎汝於知己真少思哉更憑歌舞為媒
算合作人間鴆毒猜況疾無小大生於所愛物無美惡
過則為災與汝成言勿留亟退吾力猶能肆汝杯杯再

拜道麾之即去有召須來

前調

破酒戒
次前韻

辛棄疾

杯汝知乎酒泉罷侯鷗夷乞骸更高陽入謁都稱釐白
杜康初筮正得雲雷細數從前不堪餘恨歲月都將麴
蘖埋君詩好似提壺却勸沽酒何哉君言病豈無媒
似壁上雕弓蛇暗猜記醉眠陶令終全至樂獨醒屈子
未免沈災欲聽公言慙非勇者司馬家兒解覆杯還堪
笑借今宵一醉為故人來

前調

和吳
子似

辛棄疾

我見君來頓覺吾廬溪山美哉悵平生肝膽都成楚越
只見膠漆誰是陳雷搔首踟躕愛而不見要得詩來渴
望梅還知否恰清風入手日看千回直須抖擻塵埃
人怪我柴門今始開向松間乍可從他喝道庭中且莫
踏破蒼苔豈有文章漫勞車馬待喚青芻白飯來君非
我任功名意氣莫恁徘徊

前調

辛棄疾

老子平生笑盡人間兒女怨根況白頭能幾定應獨往
青雲得意見說長存抖擻衣冠憐渠無恙合挂當年神
武門多如夢算能爭幾許雞曉鐘昏此心無有親冤
况抱甕年來自灌園但淒涼顧影頻悲往事殷勤對佛
欲問前因却怕青山也妨賢路休鬪尊前現在身山中
友試高吟楚些重與招魂

前調

靈山築堰
湖未成

辛棄疾

壘嶂西馳萬馬回旋衆山欲東正驚湍直下跳珠倒濺

小橋橫截缺月初弓老合投閒天教多事檢校長身十
萬松吾廬小在龍蛇影外風雨聲中爭先見面重重
看爽氣朝來三四峰似謝家子弟衣冠磊落相如庭戶
車騎雍容我覺其間雄深雅健如對文章太史公新堤
路問堰湖何日煙水濛濛

前調

次辛稼軒韻

丘 宓

雨趁輕寒風作秋聲燕歸鴈來動天涯羈思登山臨水
驚心節物極目煙埃客裏逢君纔同一笑何遽言歸如

此哉別離久算不應興盡却棹舡回 主人下榻高齋
更檢點笙歌頻宴開便流連不到迎春見柳也須小駐
度臘觀梅樓上盈盈閨中脈脈應念胡麻好種栽從教
去正危闌望斷小倚徘徊

前調

夢方
孚若

劉克莊

何處相逢登寶釵樓訪銅雀臺喚厨人所就東溟鯨鱠
圉人呈罷西極龍媒天下英雄使君與操餘子誰堪共
酒杯車千乘載燕南代北劒客奇材 飲酣鼻息如雷

誰信被晨雞催喚回歎年光過盡功名未立書生老去
機曾方來使李將軍遇高皇帝萬戶侯何足道哉推衣
起但淒涼感舊慷慨生哀

前調

送包尉

劉克莊

我羨君歸一路秋風芙蓉木樨想慈顏望久靈烏乍噪
新睂畫就郎馬頻嘶忙脫征衫快呼斗酒細與家人說
建溪情知道這中年懷抱生怕分攜 丈夫南北東西
應笑煞離筵粉淚啼悵佳人來未碧雲冉冉王孫去後

芳草萋萋明日相思山長水復古道
人稀茆店雞元龍
老有高樓百尺誰共登梯

前調

寄鍾
賢良

劉克莊

我夢見君帶飛霞冠著宮錦袍與牧之高會齊山風月
謫仙同載采石雲濤萬卷星羅千篇電埽不學窮鬼賦
楚騷掀髯處有魚龍起舞狐兔悲嗥
英雄埋沒蓬蒿
暗摸索當年劉與曹歎事機易失功名難偶誅茆西崦
種秫東皋柵有雞豚庭無羔鴈不是先生索價高人間

窄待相期海上共摘蟠桃

前調

寄九華
葉賢良

劉克莊

一卷陰符二石硬弓百觔寶刀更玉花驄噴鳴鞭電抹
烏絲開展醉墨龍跳牛角書生虬髯豪客談笑皆從折
簡招依稀記曾請纓繫粵草檄征遼 當年目視雲霄
誰信道淒涼今折腰悵燕然未勒南歸草草長安不見
北望迢迢老去胸中有些磊塊歌罷猶須著酒澆休休
也但帽邊鬢減鏡裏顏彫

前調 白蓮

劉清夫

淺碧芙蓉素豔亭亭前身阿嬌記湘濱露冷酥容倍潔
華清水滑酒暈全消瑤翦豐肌雲翻碎萼白羽鮮明時
自搖風流處是古香幽韻時度鮮飈瓊姿璧月清標
對千朵嬋娟傾翠瓢況水晶臺榭低迷淨綠冰霜詞調
隱約輕撓細認金房種竒孕秀已覺青衿橫素腰西風
晚看花開十丈玉井非遙

前調

別陳
總帥

程秘

玉局仙人輕帆萬里送入三吳怪一舟如葉元無濁物
依然姑射滿載冰壺昔日文君千言成誦不識如今記
得無新來也喜都將分付一顆驪珠 向來田賦蠲輸
散多少春風已與渝算公家廳了尊羹而已何妨西子
白髮江湖印鑄黃金時來須佩畢竟人生萬卷書離情
處正秦淮歲晚雪意模糊

前調

壽李
道判

程秘

那用招秋休言推暑風自薰今問誰解當初識公來處

月明碧落旆卷青霓千丈長松起人生意凍芋寒瓜空
滿畦還堪怪怪諸公袞袞我尚憑泥須教一舉崔嵬
算人世功名各有梯更何須鍊鼎玄霜絳雪只煩煮茗
水餅冰蘂紫府多仙招來滿座公自長生角亢齊何曾
也有玉麟行地老鳳梧棲

前調

謝劉小山
頻寄所作

程秘

君有新詞何妨為我時遣奚奴看此山大小風流晉宋
眼中餘子苦自侏儒九曲清溪千枝楊柳還記新條更

有無春將好欲從君商略君意何如 佳人玉佩瓊裾
更胸中澆灌有詩書把古人行處從頭檢點今人說底
却不須渠更上石頭重登鍾阜畫作金陵攷古圖頻相
見怕薰風早晚便隔天隅

前調

王千秋

豈蕊嬌春煙花羞暖物華漸嘉也不須鶯怨桃封絳萼
不須蜂恨蘭鬱金芽料是東君都將和氣分付清豐詩
禮家充問慶有青氈事業丹鳳才華 乘槎早上雲霞

曾侍祠甘泉瞻羽車試笑憑熊軾嘉禾合穗進思魚鑰
菡萏駢花蕭冠勲名龔黃模樣入拜行趨堤上沙今宵
裏且觥船滿棹醉帽敲斜

前調

西巖
三澗

劉圻父

雲壑泉泓小者如杯大者如罌更石筵平瑩寬容數客
淙流回激環遶飛觥三澗交流兩崖懸瀑擣雪飛霜落
翠屏經行處有丹萸碧草古木蒼藤徘徊却倚山楹
笑山水娛人若有情見傍回側轉峰巒疊疊欲窮還有

巖谷層層仰視雲間茆茨雞犬疑有仙家來避秦青林
表望煙霞縹緲隱隱鸞笙

前調

三榮橫溪
閣小宴

陸游

粉破梅梢綠動萱叢春意已深漸珠簾低卷筇枝微步
氷開躍鯉林暖鳴禽荔子扶疎竹枝哀怨濁酒一尊和
淚斟凭闌久歎山川冉冉歲月駸駸當時豈料如今
漫一事無成霜鬚侵看故人强半沙堤黃閣魚懸帶玉
貂映蟬金許國心堅朝天無路萬里淒涼誰寄音東風

裏有灞橋煙柳知我歸心

前調

陸游

一別秦樓轉眼新春又近放燈憶盈盈倩笑纖纖柔握
玉香花語雪暖酥凝念遠愁腸傷春病思自怪平生殊
未曾君知否漸香消蜀錦淚漬吳綾難求繫日長繩
況倦客飄零少舊朋但江郊鴈起漁村笛怨寒釭委燼
孤硯生冰水遠山圍煙昏雲慘縱有高臺常怯登消魂
處是魚箋不到蘭夢無憑

前調

送人赴
榮道宰

劉過

萬里湖南歷歷江山比吾舊遊看飛鳬仙子張帆石上
周郎赤壁鸚鵡滄洲盡吸西江醉中橫笛人在岳陽樓
上頭波瀾靜泛洞庭青草東整蘭舟長沙會府風流
有萬戶娉婷簾玉鈎恨楚城春晚岸花檣燕還將客送
不是人留且喚陽城更招元結摩撫三關歌詠休心期
處算世間真有跨鶴揚州

前調

送豐城
王禹錫

劉過

自注銅瓶作梅花供尊前數枝說邊頭舊事人生消得
幾番行役問我何之小隊紅旗黃金作印直待封侯知
幾時杯行處想淋漓一醉明日東西如椽健筆鸞飛
重為寫春風陌上詞便平生豪氣消磨酒裏世間此樂
兒輩爭知霜冷貂裘夜寒如水飲到月斜猶未歸仙山
路有笙簧度曲聲到琴絲

前調

寄辛承旨

劉過

斗酒壘肩風雨渡江豈不快哉被香山居士約林和靖

與坡仙老駕勒吾回坡曰西湖正如西子濃抹淡妝臨
鏡臺二公者皆掉頭不顧只管傳杯白雲天竺去來
圖畫裏崢嶸樓閣開愛縱橫二澗東西水繞兩峰南北
高下雲堆逋曰不然暗香浮動不若孤山先訪梅須晴
去訪稼軒未晚且此徘徊

前調

寄孫竹湖

劉過

問訊竹湖竹如之何如何未歸道吳山越水無非佳處
來無定止去亦何之只怕秋來未能忘耳心與輕雲一

樣飛愁無奈但比牕寄傲南澗題詩 人生萬事成癡
算世上久無公是非恨雲臺突兀無君子者雪堂流落
有美人兮踈雨梧桐微雲河漢鐘鼎山林無限悲陽山
縣是昌黎誤汝汝誤昌黎

劉過

前調

玉帶金魚綠鬚朱顏神仙畫圖把擎天柱石空留綠野
濟川舟楫閒倚西湖天欲安劉公歸重趙許大元勛誰
得如平章看直人如伊呂世似唐虞 不須別樣規模

但收攬人才多用儒況自昔軍中膽能寒敵而今胸次
氣欲吞吳紫府真人黑頭元宰收斂神功寂似無歸來
好正芝香棗熟鶴瘦松癯

前調

張路分
秋閨作

劉過

萬馬不嘶一聲寒角令行柳營見秋原如掌鎗刀突出
星馳鐵騎陣勢縱橫人在油幢我韜總制羽扇從容裹
帶輕君知否是山西將種曾繫詩名 龍蛇紙上飛騰
看落筆回檐風雨驚使塵沙出塞封侯萬里印金如斗

未慙平生拂拭腰間吹毛劍在不斬樓蘭心不平歸來
晚聽隨車鼓吹也帶邊聲

前調

席上口占時
有新第宗室

劉過

一劍橫空飛過洞庭又爲此來有汝陽璉者唱名殿陛
玉川公子開宴尊壘四舉無成十年不調大宋神仙劉
秀才如何好將百千萬事付兩三杯 未嘗戚戚於懷
歎自古英雄安在哉看錢塘江上潮生潮落姑蘇城裏
花謝花開道號書生強名舉子漸老雪從頭上催誰羨

汝擁三千珠履十二金釵

前調

劉過

柳思花情湖山應怪先生又來想舊時談舌依然解便
六丁奔走驅斥風雷翠袖傳觴金貂換酒痛飲何妨三
百杯人間世算謫仙去後誰是天才 碧牕畫鼓舩齋
胸次與乾坤一樣開試雲間招手下呼餘子逡巡去矣
但覺塵埃若是花時無風無雨一日須來一百回教人
道任玉山自倒不用人推

前調

劉過

緩轡徐驅兒童聚觀神仙畫圖放芹泥雨過芹香路軟
金蓮自策小小籃輿倚柳題詩穿花勸酒喫蕊攀條得
自如山行處有松篁夾道不用傳呼 清泉石下盤紆
算風景江淮各自殊記東坡賦好紗籠舊壁西山句妙
簾捲晴虛白玉堂深黃金印大無此文君載後車杯行
處想淋漓醉墨真草行書

前調

馮可遷號予
為東仙故賦

張輯

東澤先生誰說能詩興到偶然但平生心事落花啼鳥
多年盟好白石清泉家近宮亭眼中廬阜九疊屏開雲
錦邊出門去且掀髯大笑有釣魚舫一絲風裏嬋娟
愛月在滄浪上下天更叢書觀徧筆牀靜書蓬牕睡起
茶竈疎煙黃鶴來遲丹砂成未何日風流葛稚川人間
世聽江湖詩友號我東仙

前調

東章使君
再遊西園

黃機

問訊西園一春幾何君今再遊記流觴亭北偷拈酒戲

凌雲臺上暗度詩闌略略花痕差差柳意十日不來紅
綠稠須重醉便功名了後白髮爭休 定誰騎鶴揚州
任書放牀頭酸瓮頭況殷勤鶯燕能歌更舞輕狂蜂蝶
欲去還留歲月易忘姓名須載筆勢翩翩回萬牛歸來
晚有燭明金翦香暖珠篝

前調

黃機

暑氣清微梅腮漸紅麥鬚未黃恨牡丹多病醫治費巧
醪醖易老點綴無方客裏光陰愁中意緒想美人兮山

水長銷凝處有龍絲陸簡來喚持觴 華堂賸貯春光
燦一行珠璣時樣妝更燕輕留態詞翻古調鶯嬌欲展
曲度新腔玉漏聲沉銀潢影瀉殢酒猶燒心字香歸來
也判明蚪永日瑞錦鴛鴦

前調

為潘柳
州壽

黃機

問訊山翁殷勤為底來萬山中想橘邊丹井鶴尋舊約
松間碧洞鹿養新茸霧節亭亭星旂曳曳導以浮丘雙
玉童嬉遊處盡祥煙瑞雨霽月光風 歡聲已與天通

更日夜郴江流向東定催歸有詔泥香芝檢留行無計
路熟花驄入侍嚴凝密陪清燕吳水歡然相會逢年年
裏對春如酒好酒似春濃

前調

次岳總
幹韻

黃機

日過西牕客枕夢回庭空放衙記海棠洞裏泥金寶箏
餘釀架下油壁鈿車醉墨題詩薔薇露重滿壁飛鴉行
整斜爭知道向如今漂泊望斷天涯小桃一半蒸霞
更兩岸垂楊渾未花便解貂貫酒消磨春恨量珠買笑

酬答年華對面青山招之不至說與浮雲休苦遮山深處見炊煙又起知有人家

前調

送徐孟堅
秩滿還朝

黃機

人物眇然落落曉星如今幾何有飄搖長袖工持月斧
寂寥遺韻妙鼓雲和政事文章特其餘事英氣橫空時
浩歌還堪笑似龍文古鼎誰復摩挲青絲繫馬庭柯
為小駐壽君金叵羅說一時偉望齊高岳麓二年遺愛
拍滿湘波世事多端細憑商略痛飲不須言語多從今

去好經從烏府躡上鑾坡

前調

雲山樓

劉鎮

爽氣西來玉削羣峰千杉萬松望疎林清曠晴煙紫翠
雪邊迴棹柳外聞鐘夜月瓊田夕陽金界倒影樓臺表
裏空橋陰曲是舊來忠定手種芙蓉仙翁心事誰同
付魚鳥相忘一笑中向月梅香底招邀和靖雲山高處
問訊梁公物象搜奇風流懷古消得文章萬丈虹沉吟
久想依依春樹人在江東

前調

和潛夫韻
送孫季蕃

劉鎮

誰似花翁長年湖海蹇驢敝裘想紅塵醉帽青樓歌扇
揮金談笑指玉風流吳下阿蒙江南老賀肯為良田二
頃謀人間世算槐根一夢螻蟻王侯悠悠吾道何求
況白首相逢說舊遊記疎風淡月寒燈古寺平章詩境
分付糟丘聚散搏沙炎涼轉燭歸去來兮萬事休無何
有問從前那個騎鶴揚州

御選歷代詩餘卷八十九

欽定四庫全書

御選歷代詩餘卷九十目錄

一百十四字

沁園春

中

洪咨夔

三首

盧祖皋

汪莘

三首

李昴英

陳經國

二首

趙以夫 二首

方岳 六首

張榘

馮取洽 六首

蔣捷

歐良

姚勉 九首

王鼎翁

何夢桂
二首

吳潛

陳草閣

葛長庚
三首

元好問

御選歷代詩餘卷九十目錄

欽定四庫全書

御選歷代詩餘卷九十

一百十四字

司經局洗馬掌局事兼翰林院修撰加二級臣王奕清奉

旨校刊

沁園春 中

沁園春

壽俞紫微

洪咨夔

詩不云乎蒹葭蒼蒼白露為霜看高山喬木青雲老幹
英華滋液亦斂而藏匠石操斤便游林下一舉採之充

棟梁須知道是天將大任
翁處還張薇郎玉佩丁當
問何時午橋花竹莊
又星回歲換臘殘春淺
錦熏籠紫栗玉杯黃
喚起東風吹醒宿酒
甲子從頭重數將明朝
去趁傳柑宴近滿袖天香

前調

洪咨夔

秋氣悲哉薄寒中人
皇皇何之更黃花吹雨
蒼苔滑屐闌空關鴨牀
老支龜靜裏蛩音明邊
睂蹠蹴踏星河天脫鞵
清談久頌兩忘妍醜
嫫母西施濂溪家住江湄

愛出水芙蓉清絕姿好光風霽月一團和氣尸居龍見
神動天隨著察工夫誠存體段箇裏言語文字非君家
事莫空將太極散打圖碑

前調

洪咨夔

歸去來兮杜宇聲聲道不如歸正新煙百五雨留酒病
落紅一尺風妒花期睡起綠牕銷殘香篆手板揩頤還
倒持無人解自追游仙夢作送春詩風流不似年時
把別墅江山供奕棋空一川芳草半池晴絮歌翻長恨

賦續懷離桃葉渡頭沉香亭北往事悠悠難重思徘徊
處看鳴鳩喚婦乳燕將兒

前調

雙溪
狎鷗

盧祖皋

幾葉彫楓半篙寒日傍橋繫船愛洞門深鎖人間福地
雙溪分占天上星躔破帽敲寒短鞭敲月此地經行知
幾年空贏得似沈郎消瘦還欠詩篇沙鷗伴我愁眠
向水驛風亭紅蓼邊有村醪可飲且須同醉溪魚堪鱸
切莫論錢笠澤波頭垂虹亭上橙蟹肥時霜滿天相隨

否箕江南江北惟有君間

前調

自題
方壺

汪莘

春至傷春秋至悲秋誰在華胥歎謫仙才氣飛揚跋扈
淵明心事慷慨歛歛自我少時如今晚境行半人間真
有餘都休問且一觴一咏吾愛吾廬南皋境界何如
捨明月清風誰與居望蓬山路杳萬株翠檜方壺門掩
四面紅蕖中有佳人綽如姑射一炷清香滿太虛塵寰
外被鳴鸞報客飛鶴傳書

欽定四庫全書

御選歷代詩餘

卷九十

三

前調

山憶黃

汪莘

三十六峰三十六谿長鎖清秋對孤峰絕頂雲煙競秀
懸崖峭壁瀑布爭流洞裏桃花仙家芝草雪後春正取
次遊親承見是龍潭白晝海湧潮頭當年黃帝浮丘
有丹枕玉牀猶在不向天都月夜遙聞鳳管翠微霜曉
仰盼龍樓砂穴長紅丹爐已冷安得靈方問蜚修誰知
此只原頭白鹿水畔青牛

前調

軸挂黃山圖十二
恰滿一室

汪莘

家在柳塘榜挂方壺圖挂黃山覺仙峰六六滿堂峭峻
仙溪六六遶屋潺湲行到水窮坐看雲起只在吾廬尋
丈間非人世但鶴飛深谷猿嘯高巖如今雙足蹢躅
向畫裏嬉遊卧裏看甚花開花落悄無人見山南山北
誰似余閒住箇菴兒了些活計月白風清人倚闌山中
友類先秦氣貌後晉衣冠

前調

監司元宵
招飲不赴

李昂英

纔到中年節物渾閒賞心頓輕據隨分東風瓶簪柳雪

欽定四庫全書

御選歷代詩餘

卷九十

四

應時燈夜棚綴蓮星自一家春也三杯酒巧繭堆香笑
語聲又何須聽西樓絃管南陌簫笙平生黃卷青燈
宵珠翠奢華八尺檠欲趁隊閒嬉雕鞍寶馬回頭猛憶
破案囊螢鄰曲漁歌庭除鶴舞塵外冰輪徹骨清人間
處這炯然方寸一點長明

前調

陳經國

把酒西湖花月三年不見粲山想荊州座上消磨歲月
唐風集裏收卷波瀾鶴邑朝帆鱸鄉夕棹來往菰蒲何

處間應思我似騎驢杜甫長在長安
相逢依舊開顏
聽玉屑霏霏當暑寒笑髯生如許尚誇年少心忙未了
浪說身閒鹿夢無憑菟裘堪老付子聲名我欲還斜陽
外把平生心事同倚闌干

前調

陳經國

過了梅花縱有春風不如早還正燕泥日暖草絲別路
鶯朝煙淡柳拂征鞍黎嶺天高建溪雷吼歸好不知行
路難龜山下漸楊梅初熟盧橘猶酸
名場老我間闌

分歲晚誅茆湖上山歎龍舒君去尚留破硯魚軒人老
長把連環鏡影霜清衣痕塵暗贏得狂名傳世間君歸
日見家林舊竹為報平安

前調

次劉後
村韻

趙以夫

秋入書幃漏箭初長熏鑪未灰向酒邊陶寫韓情杜思
案頭料理漢蠹秦煨天有高情世無慧眼剛道先生是
不材人都笑這當行鋪席又不成開 忘懷物外徘徊
與鷗鷺同盟兩莫猜似龍蛇匣裏光涵牛斗鳳凰臺上

聲挾風雷寶汞一錢冰銜三字浮利浮名安在哉太平
也要泥金鏤玉除是公來

前調

次方時
父韻

趙以夫

自笑生來骨相無奇壬三甲三覺紫宸班裏都忘故步
維摩室內添箇新參壯也不如老之將至何止嵇康七
不堪江湖客況詩肥賈島骨瘦王曇 紛紛紆紫拖藍

送水北山人又水南喜支離得佚散材為壽一丘自足
萬象中涵膾炙功名膏育富貴舉世黃梁夢正酣知誰

健且茹芝商嶺飲菊胡潭

前調

賦子規

方岳

儘為春愁儘勸春歸直恁恨深況雨急黃昏寒欺客路
月明夜半人夢家林店舍無煙楚鄉寒食一片花飛那
可禁小凝竚點紅薦翠老江樹陰陰汀洲杜若誰尋
想朝鶴怨兮猿夜吟甚連天芳草淒迷離恨拂簾香絮
撩亂深心汝亦知乎吾今倦矣甕有餘春可共斟歸來
也問淵明而後誰是知音

前調

騷括蘭亭序

方岳

歲在永和癸丑暮春修禊蘭亭有崇山峻嶺茂林修竹
清流激湍映帶山陰曲水流觴羣賢畢至是日風和天
氣清亦足以供一觴一咏暢叙幽情 悲夫一世之人
或放浪形骸遇所欣雖快然自足終期於盡老之將至
後視猶今隨事情遷所之既倦俛仰之間迹已陳興懷
也將後之覽者有感斯文

前調

和宋令致苔梅

方岳

有美人兮鐵石心腸寄春一枝喜蘇生龍甲那因雪瘦
月橫鶴膝不受寒欺雲卧空山夢回孤驛生怕渠嗔未
敢詩江頭路問銷魂幾許索笑何時 賦成字字珠璣
君莫倚家風舊解題歎水曹安在飄然欲去逋仙已矣
其與誰歸煙雨愁予江山老我畢竟歲寒然後知微酸
在儘危譙斜倚殘角孤吹

前調

用梁權郡
韻錢春

方岳

鶯帶春來鴈喚春歸春總不知恨楊花多事杏花無賴

半隨殘夢半惹晴絲立盡碧雲寒江欲暮怕過清明燕
子時春且住待新筍熟了却問行期問春春竟何之
看紫態紅情難語離想芳韶猶剩牡丹知處也須些個
付與茶蘼喚取娉婷觀教春醉不道五更花漏遲愁一
晌笑車輪生角早已天涯

前調

和趙司
戶紅藥

方岳

把酒問花繭栗梢頭春今幾何笑身居近侍階翻萬玉
面勻菩薩髻擁千螺一一牙籤英英碧字占定花間甲

乙科歸來也傍紫薇吟處揉作陽和 祇今花事無多
看幾許風煙付與他待園將翡翠怕蜂黏粉織成雲錦
遣鳳銜梭誰翦并刀贈之燕玉莫負雙蛾嬌溜波花應
道儘花強人面底用能歌

前調

和林
教授

方岳

子盍觀夫商丘之木有樗不才縱斧斤睥睨何妨雪立
風煙傲兀怎問春回老子似之倦游久矣歸曬漁蓑羹
芋魁村鉏外聞韭今有子芥已生臺 天於我輩悠哉

縱作賦問天天亦猜且醉無何有酒徒陶陸與二三子
詩友陳雷正爾眠雲阿誰敲月不是我曹不肯來君且
住怕口生荆棘胸有塵埃

前調

壽吳履齋

張 槩

綠野歸來筇杖角巾豈不快哉有清泉白石東西巖岫
翠陰紅影高下樓臺況是蕤賓槐庭暑薄照眼葵榴次
第開輕薰裏翦香蒲為壽一笑傳杯 栽培多少英材
更霖雨看看徧九垓算支撐厦屋正資梁棟調和鈞鼎

須用鹽梅旒冕興思搢紳顒望應有天邊丹詔催依還
是為蒼生一起重位元台

前調

次韻
四友

馮取洽

我愛之君結屋屏山友松竹梅有倦游孤劍暫懸素壁
醉吟行屨時印蒼苔得失不驚知恬交養浩浩胸中何
壯哉須知道似驂騑萬里道路方開 相期湖上舒懷
莫放過花枝與酒杯況上天已辦河東新賦園橋樂得
海內英才矍鑠溪翁據鞍一笑畫餅功名賦儻來長堤

上看柳花荷氣儘可追陪

前調

馮取洽

一雨沛然六合全
清空無點埃
喜秋容新沐
為誰媚嫵
涼蟾留照
政爾徘徊
蠟屐清游
漁蓑淡話
富貴於余何
有哉
雙溪上
總舊盟
鷗鷺來往無猜
煙霞竹石松梅
更無數
幽花陸續開
漸黃雞啄黍
肥堪一箸
浮蛆拍甕
美可三杯兒解
應門翁方索句
俗客來時莫放來
青山好儘從今日
日闌不妨排

前調

用前韻謝
魏菊莊

馮取洽

舉世紛紛風靡波流名氛利埃有幽人嘉遯長年修潔
寒花作伴竟日徘徊餐薦夕英杯迎朝露世味何如此
味哉揚揚蝶儘弄芳來往我又奚猜 雙溪約玉林梅
擬直到莊門一扣開奈衡山風急勒教回駕橫塘水弱
未許浮杯恨結停雲神馳落月白雪風前急墮來教兒
唱侑衰翁一醉無悶堪排

前調

再用前韻
答呂柳溪

馮取洽

問訊柳溪溪上柳容胡為帶埃歎陽春陡變孰為披拂
賞音難遇誰與徘徊好在湖山吾容不辱寄徑垂條豈
偶哉休搖蕩且深根寧極免俗人猜 何妨傍竹依梅
待青眼春回一笑開儘攀絲弄葉效顰施黛籠顰拂帽
竊蔭傳杯未礙飛絲一高千丈風力微時穩下來天難
問便陶門漢苑一任安排

前調

和王
林韻

馮取洽

人事好乖雲散風流暗思去年記竹輿伊軋報臨村裏

筇枝顛倒忙返溪邊翦韭新炊尋桃小酌取次懽謠俱
可編難忘處是陽春一曲羣唱尊前新晴又放花天
況家釀堪攜不用錢想有人如玉已過南市無人伴我
重醉西阡舊約難憑新詞堪賦樂事賞心那得全歸來
也命兒將此意寫似朱絃

前調

贈錦江歌
者何琮

馮取洽

有孤竹君音節拂雲謚曰洞簫縱柳郎填就周郎顧罷
欠伊品藻律也難調慚媿何郎嗚嗚娟娟翻入鬢脣齒

舌喉誰知道是郭郎親授共貫同條
後來一輩枵枵甚聲響都如鸚鵡嬌
歎秦青已往嘉榮何在念奴骨朽
李八魂銷試向君前聽君一曲前
輩風流未覺凋馮郎
老但點頭嚙唾擦解金貂

前調

書南
堂壁

蔣捷

老子生平辛勤幾年始有此廬也學那陶潛籬栽些菊
依他杜甫園種些蔬除了雕梁宥容紫燕誰管門前長
者車怪近日把一庭明月却借伊渠
鬢邊白雪紛如

又何苦招賓納客歟但夏榻宵眠面風敲枕冬檐晝短
背日觀書若有人尋只教僮道這屋主人今自居休羨
彼有搖金寶轡織翠華裾

前調

未開梅

歐良

我善觀梅識梅妙處舍我其誰待裁冰翦雪已無足道
凝酥弄粉愈不為奇枉費心神巡檐索笑點校南枝并
北枝梅應道似這般題品未是相知分明有箇端倪
遮莫把人間凡眼窺那精神全在半含蕊處風流全在

未有香時萬木叢邊兩三點白此是生生化化機花開也又怎生消得箇樣詞兒

前調

壽同年
陳探花

姚勉

憶昔東坡秀奪簪山生丙子年蓋丙離子坎四方中氣宜當此歲間出英賢河嶽鍾靈星辰再孕來自赤城中
洞天新秋霽萃一襟爽氣風露澄鮮玉階同聽臚傳
伴寶馬如龍絲裊鞭正椿庭未老同躋榮路萼樓爭耀
相照魁躔即似坡公金蓮夜對身作玉堂雲霧仙憐同

歲但乞如夢得分買山錢

前調

壽婺州
陳可齋

姚勉

四海中間第一清流惟有可齋看平生踐履真如冰玉
雄文光燄不浣塵埃元祐諸賢紛紛臺省惟有景仁招
不來狂瀾倒獨中流砥柱屹立崔嵬掛冠有請高哉
但清廟正需梁棟材便撐舟野水出航巨海有官鼎鼐
無地樓臺製菊齡高看莫人健萬頃秋江入壽杯經綸
了却馭風騎氣閬苑蓬萊

前調

壽張府判室

姚勉

梅笑東風只兩日間又新歲華有玉龜阿母獻三蟠實
蕊宮仙子飛七香車春滿鰕簾雪晴鴛瓦牕戶非煙籠
翠紗萱堂上看衣翻戲綵觴捧流霞君家元是仙家
幾度看菖蒲九節花來劒池丹井平分風月一溪流水
猶泛胡麻壽慶千秋榮封兩國綠鬢猶深楊柳鴉長生
藥在蓬萊頂上不必丹砂

前調

送權倅
許帳幹

姚勉

萬里清風吹送錦帆入南浦雲看拂天旌旆攀留不住
迷津舸艤歌舞相迎二許家聲三洪地望今代風流第
一人蜚英早合詞林視草藜閣翻芸飛芻遠餉三軍
特借作紅蓮入幕賓把西山暮雨暫時收捲荷山明月
小試平分甦醒枯魚剔除深蠹箇是人間有脚春難淹
久看詔催入侍香案麒麟

前調

七月朔
壽盧守

姚勉

一葉新涼又是西風吹轉素商攬玉壺英氣鍾為人物

銀河精采融作文章司巧天公攬先七夕分付天孫雲
錦裳騎龍鳳自九霄飛至萬丈光芒 早年奏賦長楊
飽挹盡瀛洲風露香問石渠天祿借將班馬荷山錦水
暫作龔黃蘭省春風被垣夜月合佩仙花侍玉皇明年
裏飲壽椒何處宣勸持觴

前調

壽楊帥參次
日將之官

姚勉

摘玉蕊梅泛金葉蕉祝公壽齡算今年比似常年迥別
翠煙紅霧香靄門屏鳳詔雲霄龍光牛斗輝射南州孺

子亭看看是伴元戎小隊花柳郊垌 傳家有子明經
渾不要黃金遺滿贏向月中傳與一枝仙桂爛斑衣上
更著袍青明日瓜期今朝椿壽玉樹芝蘭羨滿庭公知
否老人星一點映泰階星

前調

壽趙作

姚勉

道骨仙風海上騎鯨端是後身把銀河天巧鍾為文采
劍津寶氣融作精神壺玉儲冰掌金擎露胸次全無一
點塵年年裏早花朝六日長慶生申 屏篋濯錦江濱

人盡道如公清最真合沉香亭北金箋奏曲恩披獸錦
醉拭龍巾泥紫頰來渠黃飛去自是八花甄上人從今
後看大鈞播物萬象皆春

前調

錢張
倅

姚勉

明月扁舟輕逐江鷗翩然賦歸任顛風掀舞濤山浪屋
少須平定一碧琉璃柳絮浮雲有無根蒂到底不磨真
是非呵呵笑看人情如紙世事如棋宜堂事事皆宜
把杯酒論文更有誰記風雲滿席吟情浩蕩龍蛇滿壁

醉墨淋漓別後相思有書寄否春在梅花第一枝重相
見約柳堤撐舫竹閣尋詩

前調

送友人
歸蜀

姚勉

拂劒整裝光射斗牛色正芒寒大丈夫不作兒曹離別
何須更唱三疊陽關書錦還鄉油幢佐幕誰道青天行
路難從今去聽聲名燄燄飛動岷山 征途少飲加餐
要做取功名久遠看捲長風吹醒劒關雲氣更須砥柱
三峽驚湍聞道槐庭已登安石此去須彈貢禹冠明年

裏踏梅花有分相見長安

前調

王鼎翁

又是年時杏紅欲吐柳綠初芽奈尋春步遠馬嘶湖曲
賣花聲過人唱鶯紗暖日晴煙輕衣羅扇看徧王孫七
寶車誰知道又十年魂夢風雨天涯休休何必傷嗟
漫贏得清清兩鬢華且不知門外桃花何代不知江左
燕子誰家世事無情天公有意歲歲東風歲歲花撩一
笑且醒來杯酒醉後杯茶

前調

何夢桂

老去無心看盡青山山前暮雲間重來海燕烏衣安在
乍歸遼鶴華表空存世路悠悠風塵渺渺白髮相催烏
兔頻浮生事算天涯海角誰是閒人 幾番甲子庚申
看青草年年秋又春笑武陵源上桃花未實崑崙山下
瑤樹長新霓羽飄零蛾眉蕭颯欲覓神仙隔兩塵草堂
在但休教猿鶴夜半移文

前調

壽何逢
原北堂

何夢桂

孔蓋霓旌月佩雲裳人間女仙問韶光九十何如今日
花朝百五好是明年戲舞稱觴一堂家慶眼見兒孫曾
又玄竒絕處看菱花白髮不改朱顏當年手種紅蓮
笑幾度桑田滄海乾想蟾胎鍊就紫皇靈藥龍驤飛墮
玉女雲軿青鳥重來紅霞儼在一曲雲和猶未閒羞塵
世把蛾眉蟬鬢空為誰妍

前調

梅

吳潛

十月江南一番春信怕凭玉闌正地連邊塞角聲三弄

人思鄉國愁緒千般草草村墟疎疎籬落猶記花間曾
卓菴茶甌罷問幾回吟遠冷淡相看堪憐影落溪南
又月午無人更漏三雖虛林幽壑數枝偏瘦已存鼎鼐
一點微酸松竹交盟雪霜心事斷是平生不肯寒林逋
在倩詩人此去為語湖山

前調

陳草閣

霜剝枯崖何處郵亭玉龍夜呼喚經年幽夢悠然獨覺
參橫璇漢漏徹銅壺漠漠風煙昏昏水月醉聳詩肩騎

瘦驢孤吟處肯尋香弔影搔首踟躕 古心落落如予
悄獨立高寒凌萬夫對荒煙野草淺溪沙路班荆三嗅
此意誰如高卧南陽歸來彭澤借問風光還似無難窮
處待憑將妙手作歲寒圖

前調

葛長庚

乍雨還晴似寒而暖春事已深是婦鳩乳燕說教魚躍
豪蜂醉蝶撩得鶯吟闌茗分香脫單衣袂回首清明上
巳臨芳菲處在梨花金屋楊柳璫林 如今詩酒胸襟

對好景良辰似有姝念恨如芳草知他多少夢和飛絮
何處追尋病酒時光困人天氣早有新秧吐嫩鍼蘭亭
畔漸流觴曲水修禊山陰

前調

葛長庚

吹面無寒沾衣不濕豈不快哉正杏花雨嫩紅飛香砌
柳枝風軟綠映芳臺燕似談禪鶯如演史猶有海棠連
夜開清明也尚陰晴莫準蜂蝶休猜朝來應問蒼苔
甚幾日都成錦繡堆念四方賓客不堪渭樹一年春事

已屬庭槐宿酒難醒多情易老爭奈傳杯不放杯如何
好看秋千戲劇蹴踘詼諧

前調

葛長庚

嫩雨如塵嬌雲似織未肯便晴見海棠花下飛來雙燕
垂楊深處啼斷孤鶯綠砌苔香紅橋水暖笑撚吟髭行
復行幽尋嬾就半牕殘睡一枕初醒銷凝次第清明
渺南北東西草又青念鏡中勲業韶光冉冉夢前今古
銀髮星星青鳥無憑丹霄有約獨倚東風無限情誰知


有這春山萬點杜宇千聲

前調

除夕

元好問

腐朽神奇夢幻吞侵朝昏變遷悵殘燈舊歲雞聲競早
春風歸興鴈影相先南渡崩奔東屯留滯世事悠悠白
髮邊虛名誤徧人間浪走恰到求田青紅花柳爭妍
意醉眼天公也放顛更雲雷怒捲頰波一注冰霜冷看
老桂千年園令家居陶潛官罷無酒令人意缺然從教
去付青山屋上明月尊前



御選歷代詩餘卷九十

欽定四庫全書

集部

御選歷代詩餘卷九十一

詳校官中書_臣潘有為

侍讀_臣孫球覆勘

總校官進士_臣朱鈐

校對官中書_臣徐秉敬

謄錄監生_臣張鱗

欽定四庫全書

御選歷代詩餘卷九十一目錄

起一百十四字
至一百十六字

沁園春
下

劉秉忠

白樸
六首

許有壬

張翥
四首

張埜
五首

邵亨貞 二首

沈景高

高啓 二首

楊基

瞿佑

吳洪

焦竑

儲懋端 二首

鄔仁卿

錢繼章

賀新郎

蘇軾

周紫芝

馬莊父

前調又一體

八歸又一體

姜夔

史達祖

宣清

柳永

瑤臺月

無名氏

沁園春

又一體

張先

劉過 二首

前調 又一體

葛長庚

前調 又一體

秦觀

摸魚兒 又一體

歐陽修

沁園春 又一體

林正大
三首

御選歷代詩餘卷九十一目錄

欽定四庫全書

御選歷代詩餘卷九十一

起一百十四字
至一百十六字

司經局洗馬掌局事兼翰林院修撰加二級臣王奕清奉

旨校刊

沁園春

下

沁園春

劉秉忠

月落簷西日出籬東曉枕睡餘喚老妻忙起晨餐供具
新炊藜糝舊蓄鹽蔬飽後安排城邊壑斲要占蒼煙十

畝居閒談裏把從前荒穢一旦驅除
為農換却為儒
任人笑謀身拙更迂念老來生業無他長技欲期安穩
敢避崎嶇達士聲名貴家驕蹇此好胸中一點無歡然
處有膝前兒女兒上詩書

前調

鳳凰臺

白樸

獨上遺臺目斷清秋鳳兮不還悵吳宮幽徑埋深花草
晉時高塚銷盡衣冠橫吹聲沉騎鯨人去月滿空江鴈
影寒登臨處且摩挲石刻徒倚闌干
青天半落三山

更白鷺洲橫二水間，問誰能心比秋來水靜。
漸教身似嶺上雲閒，擾擾人生紛紛世事，就裏何常不強顏。
重回首怕浮雲蔽日，不見長安。

前調

白樸

我望山形虎踞龍盤壯哉建康憶黃旗紫蓋中興東晉
雕欄玉砌下建南唐步步金蓮朝朝瑤樹宮殿吳時花
草香今何日尚寺留蕭姓人做梅妝長江不管興亡
漫流盡英雄淚萬行問烏衣舊宅誰家作主白頭老子

今日還鄉弔古愁濃題詩人去寂寞高樓無鳳凰斜陽
外正漁舟唱晚一片鳴榔

前調

白樸

渺渺吟懷望佳人兮在天一方問鷗鵬九萬扶搖何力
蝸牛兩角蠻觸誰強華表鶴來銅盤仙去白日青天夢
一場俄然覺正醺雞舞甕野馬飛牕徜徉玩世何妨
更誰道狂時不得狂羨東方臣朔從容帝所西真阿母
喚作兜郎一笑人間三游海上畢竟仙家日月長相隨

去想蟠桃熟後也許偷嘗

前調

白樸

自古賢能壯歲飛騰老來退閒念一身九患天教寂寞
百年孤憤日就衰殘麋鹿難馴金鑣縱好志在長林豐
草間唐虞世也曾聞巢許遁跡箕山越人無用殷冠
怕機事纏頭不耐煩對詩書滿架子孫可教琴尊一室
親舊相歡况屬清時得延殘喘魚鳥溪山任往還還知
否有絕交書在細與君看

前調

白樸

玉節星軺十道監司治稱最優甚惠風纔到豚魚亦信
清霜未降狐兔先愁鎮靜洪都澄清白下又過東南第
一州雲煙底看千巖競秀萬壑爭流離筵無計相留
漫慷慨中年白髮稠記瑤花照眼忙催詩筆松燈促座
笑遞觥籌放浪形骸欣於所遇負我蘭亭共一遊心期
在想山陰興盡和月回舟

前調

白樸

流水高山獨許鍾期最知伯牙愧我投木李得酬瓊玖
人驚玉樹肯倚薰蕕風雨十年江湖千里望美人兮天
一涯重攜手似仲宣去國江令還家門前柳拂堤沙
更好繫天津泛斗槎看金鞍鬧簇花邊置酒玉盃旋洗
竹裏供茶朱雀橋荒烏衣巷古莫笑斜陽野草花寒食
近算人生行樂少住為佳

前調

臨清舟中次
韻寄可行

許有壬

草木無情不問寒暄開時便開只黃花多事偏憐隱逸

白頭何補且避賢才老友相逢清談絕倒休校劉郎去
後栽尊中物勝他年千里漫寄寒梅 神仙合住蓬萊
奈老去思兒忍不回任景莊槐老誰為癡夢梅家酒美
且浣幽懷渭北江東暮雲春樹何日扁舟更此來公知
否便連朝觴詠能幾徘徊

前調

讀白太素
天籟集

張翥

客汝知乎載酒輕舟看花小車勝炎州出使瘴浮征旆
禁門待漏霜滿朝韡歲去堂堂老來冉冉瓶雀飛時手

怎遮平生事歎山川迹遠霄漢程賒
從渠夢蝶疑蛇
得放嬾還須自在些甚天荒地老銅臺歌舞水流雲散
金谷豪奢客問先生歸宜早計醉後之言可信邪鷗盟
在任魚蓑江上雨細風斜

前調

將此留別

張翥

天上玉堂海外瀛洲山中蛻巖甚六十四歲出時持節
八千餘里來駐征驂香火緣深功名意薄夢覺仙家雪
滿簪桐花社喜酒邊鶯燕詩外雲嵐
錦堂容我清酣

擁畫燭金鈎手屢探怪朗吟御史笑回紅粉送歸司馬
淚濕青衫蜀魄春多塞鴻秋遠無限離情老不堪空留
在任水光山色江北江南

前調

廣陵九
日泛舟

張翥

何許登臨路遶蕪城岡連楚皋愛流雲低響歌催瓊樹
微波照影人豔仙桃松院移尊柳橋攜袖隨處蘭舟且
暫捎秋無際望空江鴈遠落木天高不妨左手持螯
更右把金尊送濁醪歎難臺草暗淒然興廢龍山煙冷

老矣英豪白髮寧饒黃花儘插要裏西風破帽牢劉郎
醉把吳牋笑擘試與題糕

前調

次韻聽董氏雙絃

張翥

誰喚嬌嬈斜插雙絃華筵乍開愛玉纖輕軋半籠翠袖
歌喉緩引暗點鴛鴦蕃部新聲樂工巧製寫出龍沙馬
上哀哀何似似離鸞驚起白雀飛來 丁寧擊節金釵
要細聽春風且慢催正宮商雙犯拽歸雙調伊州入破
攔徧三臺畫扇香收羅巾汗溼愁是雲飛醉後回花間

客儘鸞綃纏髻更盡餘杯

前調

州宿瓜

張埜

瓜步城闌煙樹西津幾回往來儘洪濤千丈魚龍出沒
蒼顏十載鷗鷺驚猜驛館荒涼征鞍牢落寄語樓船且
莫開今宵裏要江聲一枕洗滌羈懷 凌晨風定潮回
便挂起雲帆亦快哉愛金山東畔天開罨畫銀山南去
地湧詩材衝破晴嵐拂開蒼蘚欲紀茲行百丈催還停
筆怕吟鞭猶帶京國塵埃

前調

泉南作

張堃

自入閩關形勢山川天開兩邊見長溪漱玉千鈞倒建
高峰潑黛萬馬回旋石磴盤空天梯架壑驛騎蹣跚鞭
不前心無那恰鷓鴣聲裏又聽啼鵑 區區薄宦誰憐
道有志從來鐵石堅但長存一片忠肝義膽何愁半點
瘴雨蠻煙盡卷南溟不供杯杓得遂斯游豈偶然天公
意要淋漓醉墨海外流傳

前調

送吳此民再任江州教

張堃

前日廬山今日廬山豈偶然哉喜青衫舊夢輕舟熟路
白雲新興翠壁丹崖石鏡光寒香爐煙裊晴雪飛空玉
峽開天公意要先生健筆洗盡塵埃 三年握手金臺
甚意氣相期隘九垓恨征帆縹緲秋風南浦書燈冷落
夜雨西齋蓮社香中琵琶亭上應念京塵無好懷君須
記向鴈回時節早寄詩來

前調

止酒效
稼軒

張栻

半世游從到處逢迎唯爾麴生喜一尊乘興時居樂土

三杯有力能破愁城豈料前歡俱成後患深悔從來見
不明筠軒上抱厭厭病枕恨與誰評請生亟退休停
更說甚濁賢與聖清論伐人心性蛾眉非慘鑠人骨髓
鴆毒猶輕裂爵熱觴棄壺毀榼交絕何須出惡聲生再
拜道苦無大故遽忍忘情

前調

壽杜
右丞

張堃

勇退歸來一擔乾坤十年息肩奈東山安石未容高卧
洛中司馬須在調元車擁蒲輪杖扶靈壽琴瑟更張為

解紃人都道果功成霖雨澤潤無邊
河汾間氣生賢
算甲子纔同絳縣年更太公八十出膺熊虎武公九十
入載貂蟬梅信春香槐堦日暖數到莊椿歲八十持杯
壽壽文章宰相廊廟神仙

前調

美人眉

邵亨貞

巧鬪彎環纖凝嫵媚明妝未收似江亭曉望遙山拂翠
宮簾暮捲新月橫鉤埽黛嫌濃塗鉛訝淺能畫張郎不
自由傷春倦為皺多無力翻做嬌羞
填來不滿橫秋

料著得人間多少愁記魚箋緘啓背人偷斂鴈鈿膠併
運指輕揉有喜先占長顰難效柳葉輕黃今在不雙尖
鎖試臨鸞一展依舊風流

前調

美人

邵亨貞

漆點填眶鳳梢侵鬢天然俊生記隔花瞥見疎星炯炯
倚欄凝注止水盈盈端正窺簾朥騰並枕睥睨檀郎長
是青端相久待嫣然一笑密意將成 因酣曾被鶯驚
強臨鏡接抄猶未醒憶帳中親見似嫌羅密尊前相顧

翻怕燈明醉後看承歌闌闌弄幾度孜孜頻送情難忘
處是鮫綃搵透別淚雙零

前調

美人指甲
和劉龍洲

沈景高

新脫魚鱗平分鵝管愛勒臂彎記掐恨香蕉愁悰細說
劃情嫩竹怨曲新翻纔貼梅鈿旋挑鉛粉繡領重交猶
道寒嬌無奈笑輕拈杏帶淺揭湘斑 宮棋也學偷彈
時綰就同心羞自看解傳杯頻賭藏闔羅袖歸鞭重數
刻印闌干暗解綃囊倦調瑤瑟餵蕊鶯兒繡閣間凝情

處把爪犀漫剝消遣春閒

前調 鴈

高 啓

木落時來花發時歸年又一年記南樓望信夕陽簾外
西牕驚夢夜雨燈前寫月書斜征霜陣整橫破瀟湘萬
里天風吹斷見兩三低去似落箏絃相呼共宿寒煙
想只在蘆花淺水邊恨鳴鳴戍角忽催飛起悠悠漁火
長照愁眠隴塞間關江湖冷落莫戀餘糧猶在田須高
舉教弋人空慕雲海茫然

前調

寄內
兄

高啓

憶昔初逢意氣相期一何壯哉擬獻三千牘叫開漢闕
躡一雙屨走上燕臺我勸君酬君歌我舞天地疎狂兩
秀才驚回首漫十年風月四海塵埃摩挲舊劒生苔
歎同掩衡門舊草萊視黃金百鎰已隨手去素絲幾縷
欲上頭來莫厭栖栖但存耿耿得失區區何足哀心惟
願對尊中酒滿樹上花開

前調

春水

楊基

巴蜀雪消湘漢冰融淨無片埃看風吹皺綠晴涵杜若
雨添香膩暖浸莓苔江漲魚鱗溪沉燕尾贏得沙鷗宿
鷺猜花陰下見行人待渡芳意徘徊 湖邊十二樓臺
映多少珠簾影倒開愛綠醅可染蒲萄新釀麴塵低蘸
楊柳初栽修禊人歸浣紗女去猶有餘香拂岸來多情
處更桃花無數流出天台

前調 巵杯

瞿佑

一掬嬌春弓樣新裁蓮步未移笑書生量窄愛渠儘小

主人情重酌我休遲醞釀朝雲斟量暮雨能使麴生風味奇何須去向花塵留跡月地偷期風流到手偏宜便豪吸雄吞不用辭任凌波南浦惟誇羅襪賞花上苑祇勸金卮羅帕高擎銀瓶低注絕勝湘裙深掩時華筵散奈此心先醉此恨誰知

前調

吳洪

莎徑吟蛩葭汀叫鴈秋氣悲哉正江天淒黯斜陽一抹亭皋搖落亂葉千堆露溼吟鞭風敲醉帽試與登臨覽

勝來憑高望見江流九曲似我腸迴
幾年南北塵埃漫贏得吳霜兩鬢催憶晚香籬畔依然陶菊暗香林下
好在逋梅跌宕琴尊評量風月已辦浮蛆澹齏杯吾歸
也喚沙頭小艇直下長淮

前調

題吳生
一枝庵

焦 竑

手葺茅庵小小何妨疎寮短屏任南山射虎封侯心在
遼東化鶴煉藥功成自愛鷦鷯一枝長足不學蝸牛戴
屋行林深處對蒼松雪庵白草煙汀
傍人抵死經營

似揀盡寒蘆宿又驚看須彌芥子同為世界枋榆九萬
未問前程壁寫滄洲襟題漢上等是風飄過耳情頻舒
笑誰古今達者惟有莊生

前調

偶賦

儲懋端

我亦何為漱彼白石枕彼清流歎舟下瀟湘吹殘楚竹
騎臨易水舞罷吳鉤飛蓋停雲曳車飄雪浪說生平遊
八州誰知道空傭書受直未得封侯少年意氣難酬
且破盡雙柑大白浮除司馬文章不須痛讀杜陵詩史

何事研求美酒一尊奇
文千首都付春江對浴鷗人休
問還三旬無食九月無裘

前調

戲作毛穎
策學士文

儲懋端

咨汝穎乎自陳老禿屢乞餘骸
念望重靈龜南山感月
名高繡虎北海驚雷鐵畫銀鉤
積成勞悴漸向秋風文
塚埋嘉乃績俾守中山郡其往
欽哉 吾將以禮為媒
縱故老終疎世莫猜
令蜀地栽箋先生久待淇園
截管 君子蒙災亟召綠沉
置之即墨錫汝龍賓水一杯
蕪策

汝端明殿學士速駕前來

前調

招隱
看梅

鄔仁卿

十里江城共向春風尋到梅花想三更幽夢影移石罅
一聲梵誦香沁牕紗鐵骨峻嶒冰姿修潔可是神仙夢
綠華今宵醉且休吹玉笛只按紅牙 槎枒綺席橫斜
恨知已難逢好句賒但已擲零落金鈴莫繫不甘爭媚
錦幕休遮冷欲侵人清能絕俗肯讓狂蜂坐晚衙風流
話道林逋妻汝端不爭差

前調

西冷
橋作

錢繼章

已遠喧闐漸覺幽涼無過西冷政微霜欲下滿船楓葉
枯荷未盡幾點殘螢鐘入蒼煙山黏遠樹拋卷方知午
夢醒悠然起看文魚唼藻野鶴梳翎安排綠酒青燈
擬淘洗閒愁向水汀恰薑絲調醋新登蟹俎蕨芽研粉
留作蓴羹頗怪山童近添閒供露菊秋葵插滿瓶陶然
醉任人呼馬走我已鴻冥

賀新郎

雙調一百十五字此調以一百十六字者為正格別名俱列一百十六字下

賀新郎

蘇軾

乳燕飛華屋悄無人桐陰轉午晚涼新浴手弄生綃白
團扇扇手一時似玉漸困倚孤眠清熟簾外誰來推繡
戶枉教人夢斷瑤臺曲又却是風敲竹石榴半吐紅
巾感待浮花浪蕊都盡伴君幽獨穠豔一枝細看取芳
心千重似束又恐被秋風驚綠若待得君來向此花前
對酒不忍觸共粉淚兩簌簌

前調

周紫芝

白首歸何晚笑一椽天教付與楚江南岸門外春山晚
無數只有匡廬似染但想像紅妝不見誰念香山當日
事漫青衫淚溼人誰管歌舊曲空淒怨將軍未老身
歸漢算功名過了唯有古祠塵滿誰似淵明擽得老飽
看雲山萬點況此老斜川不遠終待我他年自翦黃花
一盞重陽殘君為我休辭勸

前調

又一體

馬莊父

客裏傷春淺，問今年梅蕊，因甚化工，不管陌上芳塵行處，滿可計天涯近。遠見說道，迷樓左畔，一似江南先得暖。向何郎庭下，都尋徧，辜負了看花眼。古來好物難為伴，只瓊花一種，傳來仙苑。獨許揚州作珍產，須勝了，千千萬萬。又却待東風吹綻，自昔聞名，今見面，數歸期，屈指家山晚歸去，說也希罕。

八歸

又一體雙調
一百十五字

八歸

湘中送
胡德華

姜夔

芳蓮墜粉疎桐吹綠庭院暗雨乍歇無端抱影銷魂處
還見篠牆螢暗蘇堦蛩切送客重尋西去路問水面琵琶誰撥最可惜一片江山總付與啼鴂長恨相從未
款而今何事又對西風離別渚寒煙澹棹移人遠縹緲
行舟如葉想文君望久倚竹愁生步羅幃歸來後翠尊
雙飲下了珠簾玲瓏閒看月

前調

史達祖

秋江帶雨寒沙縈水人瞰畫閣愁獨煙蓑散響驚詩思
還被亂鷗飛去秀句難續冷眼盡歸圖畫上認隔岸微
茫雲屋想半屬漁市樵邨欲暮競燃竹須信風流未
老憑持尊酒慰此淒涼心目一鞭南陌幾篙官渡賴有
歌者舒綠只匆匆眺遠早覺閒愁掛喬木應難奈故人
天際望徹淮山相思無鴈足

宣清

雙調一百
十五字

宣清

柳永

殘月朦朧小宴闌珊歸來輕寒凜凜背銀釭孤館乍眠
擁重衾醉魂猶噤永漏頻傳前歡已去離愁一枕暗尋
思舊追遊神京風物如錦念擲果朋儕絕纓宴會當
時曾痛飲命舞燕蹁躑歌珠貫弗向玳筵前盡是神仙
流品至更闌疎狂轉甚更相將鳳帟鴛衾玉釵亂橫任
散盡高陽這歡娛甚時重恁

瑤臺月

雙調一百

十五字

瑤臺月

梅花

無名氏

嚴風凜冽萬木凍園林蕭靜如洗寒梅占早爭先暗吐
香蕊還素容探暖欺寒偏妝點亭臺佳致通一氣超羣
卉值臘後雪清麗開筵共賞南枝宴會好折贈東君
驛使把隴頭信息遠寄遇詩朋酒侶尊前吟綴且優游
對景歡娛更莫厭陶陶沉醉羌管怨瓊花墜結子用調
鼎堪餽將軍止渴思得此味

沁園春

又一體雙調
一百十五字

沁園春

寄都城
趙閱道

張先

心膺良臣帷幄元勲左右萬幾暫武林分閫東南外翰
錦衣鄉社未滿瓜時易鎮梧臺宣條期歲又西指夷橋
千騎移珠灘上喜甘棠翠蔭依舊春暉須知繫國安
危料節旆還趨浴鳳池且代工施化持釣播澤置孟天
下此外何思素卷書名赤松游近飈馭雲軒仙可期湖

山美有啼猿
唳鶴相望東歸

前調

美人
指甲

劉過

銷薄春冰碾輕寒
玉漸長漸彎見鳳鞵泥污偎人強別
龍涎香斷撥火輕翻學撫瑤琴時時欲翦更掬水魚鱗
波底寒纖柔處試摘花香滿鏤棗成斑時將粉淚偷
彈記綰玉曾教柳傳看算恩情相著搔便玉體歸期暗
數劃徧闌干每到相思沉吟靜處斜倚朱脣皓齒間風
流甚把仙郎暗掐莫放春閒

前調

美人足

劉過

洛浦凌波為誰微步輕生暗塵記踏花芳徑亂紅不損
步苔幽砌嫩綠無痕襯玉羅慳銷金樣窄載不起盈盈
一段春嬉游倦笑教人款捻微褪些根 有時自度歌
聲悄不覺微尖點拍頻憶金蓮移換文鴛得侶繡茵催
袞舞鳳輕分懊恨深遮牽情半露出沒風前煙縷裙知
何似似一鉤新月淺碧籠雲

前調

又一體

葛長庚

客裏家山記踏來時水曲山崖被灘聲喧夜雞聲破曉
匆匆驚覺依舊天涯抖擻征衣寒欺薄袂回首銀河西
未斜塵埃積歎有如此髮空為伊華 古來旅況堪嗟
儘貧也還須貧在家料驛舍傍邊月痕白處暗香微度
應是梅花揀折一枝路逢南鴈和兩字平安寄與他教
知道有長亭短堠五飯三茶

前調

又一
體

秦觀

宿靄迷空膩雲籠日晝景漸長正蘭皋泥潤誰家燕喜

蜜脾香少觸處蜂忙盡日無人簾幕挂更風遞游絲時
過牆微雨後有桃愁杏怨紅淚淋浪風流寸心易感
但依依竚立迴盡柔腸念小窗瑤鑑重勻絳蠟玉籠金
斗時熨沉香柳下相將游冶處便回首青樓成異鄉相
憶事縱蠻戕萬疊難寫微茫

摸魚兒

又一體雙調
一百十五字

摸魚兒

歐陽修

卷繡簾梧桐院落一霎雨添新綠小池閒立殘妝淺向
晚水紋如縠凝遠目恨人去寂寥鳳枕孤難宿倚闌不
足看燕拂風簾蝶翻露草兩兩鎮相逐雙睂處可惜
年華婉婉西風初弄庭菊況伊家年少多情未已難拘
束那堪更趁涼景追尋甚處垂楊曲佳期過盡但不說
歸來多應忘了雲屏去時囑

沁園春

又一體雙調
一百十六字

沁園春

括酒德頌

林正大

大人先生高懷逸興酒因寓名縱幕天席地居無廬室
以八荒為域日月為扃貴介時豪搢紳處士未解先生
酒適情徒勞爾漫是非蜂起有耳誰聽先生挈榼提
甕更箕踞銜杯枕麴生但無思無慮陶陶自得任兀然
而醉恍然而醒靜聽無聞熟觀無覩以醉為鄉樂性真
誰知我彼二豪猶是螺贏螟蛉

前調

括廬山草堂記

林正大

廬阜諸峰爐峰絕勝草堂介焉敞明窓淨室素屏虛榻
要仰觀山色俯聽流泉中有池臺旁多竹卉夾澗杉松
高刺天堂之北據層崖積石綠蔭濃鮮堂東瀑布飛
懸似雨露霏微珠貫穿有春花秋月夏雲冬雪更陰晴
顯晦霧吐煙吞右挹琴書左攜妻子杖屨從容盡暮年
平生志賴清泉白石實聽余言

前調

括嚴先生
祠堂記

林正大

子陵先生故人光武以道相忘幸炎符再握六龍在御

看臣來億兆陽德方剛自是先生獨全高節歸去江湖
樂未央動星象披羊裘傲晚人世軒裳高哉不事侯
王愛此地山高水更長蓋先生心地超乎日月又誰如
光武器量包荒立懦廉頑有功名教萬世清風更激揚
無今古想雲山鬱鬱江水泱泱

御選歷代詩餘卷九十一